

四庫全書

史部

欽定四庫全書

續後漢書卷二

元 郝經 撰

帝紀第一

義例曰魏晉自以為正統相繼故不舉昭烈之謚稱曰先主陳壽遂不以漢為帝紀曰先主傳非也先主者大夫稱其先大夫之辭也繼漢而不稱漢未嘗稱蜀而稱蜀蔑劣甚矣夫昭烈景帝之子中山靖王之後為左將軍時受獻帝衣帶中密詔誅曹操不克出奔徐州起兵討操又不克奔袁紹與紹討操又不克遂依劉表說表襲許以誅操表不能用及敗操于赤壁始有荆土攻劉璋于成都却操于漢中遂有巴蜀操既幽帝弑后酖殺皇子篡弑已成昭烈以為高祖

初封漢王出定三秦以討項羽故即漢中王位  
興兵討操及操死丕篡獻帝降廢漢統中絕遂  
即漢皇帝位以祀漢漢統于是乎在矣及其崩  
殂末帝嗣世孔明出師討魏繼之以死蔣琬費  
禕姜維諸人從史義烈尚數十年與魏俱斃則  
章武之元自可紹建安之末昭烈之與獻帝自  
為續承魏吳祇漢之僭偽爾豈可削漢與魏遂  
以為蜀乎其稱漢為蜀者魏晉間語也通鑑更  
蜀稱漢綱目以漢紀事統體始正矣紀統紀也  
以一統而紀天下之事也故司馬遷史記凡一  
統天下者皆曰本紀班固因之曰帝紀陳壽以  
魏為正統故以魏為帝紀漢統未絕而復與魏  
則天下有二統且魏豈能統漢哉今從綱目以  
漢昭烈末帝為帝紀魏吳皆降為傳云史記于  
高帝本紀初稱高祖及為沛公稱沛公封漢王  
則稱漢王至即皇帝位稱帝稱上崩後于他紀

傳則稱高祖班固前漢書因之范曄後漢書自  
世祖起兵即稱先武至即位後稱帝稱上崩後  
稱世祖先武猶夫前史也陳壽國志于先主傳  
始終稱先主于魏吳則始終稱姓名通鑑始稱  
姓名及即漢中王位稱漢中王至即帝位稱漢  
主崩後稱漢昭烈并以僭偽書也今從范史始  
稱昭烈至即位後稱帝稱上于魏吳則始終皆  
稱昭烈一同二漢天王正統云史記本紀二漢  
書帝紀其大法依倣春秋經傳編年事詳辭畧  
其天文災變郡國廢興禮樂刑法因革大端四  
夷興衰侵叛之迹皆備書之又見諸書志及本  
傳大抵皆重出陳壽國志無書志其事皆具于  
紀傳方之三史為詳而不重出然以魏為正統  
帝紀凡天變外夷之事皆錄于魏吳書故有者  
則錄于吳謂蜀不置史災異靡書故二主傳皆  
不錄今既正統體欲移置于漢紀則失實存之

魏傳則失體故漢紀魏吳傳皆不錄類之子八  
錄國別以見不復重出其事義相關者則凡而不因云

### 昭烈皇帝

昭烈皇帝姓劉氏諱備字玄德涿郡涿縣人景帝子中山靖王勝之後也武帝詔諸侯王得推恩侯支庶子弟靖王百餘子侯者五人元狩六年封貞涿縣陸城亭侯

元鼎五年坐酎金失侯因家焉

原注漢書孝景皇帝賈夫人生趙敬肅王彭祖

中山靖王勝勝以前三年立有子百二十餘人四十三年薨子哀王昌嗣一年薨子康王昆侈嗣十一年薨子頃王輔嗣四年薨子憲王福嗣十七年薨子懷王循嗣十五年薨無子絕四十五歲成帝鴻嘉二年復立憲王弟

孫利卿侯子雲客是為廣德茂王三年薨無子絕四十  
年哀帝復立雲客弟廣漢為廣平王薨無復平帝元始  
二年復立廣川惠王曾孫倫為廣德王秦靖王後王莽  
時絕王子侯表中山靖王子廣望節侯忠將梁侯朝平  
薪館侯未央陸城侯貞薪處侯嘉元鼎五年皆  
坐酎金失侯魚豢與畧備本臨邑侯枝屬也昭烈祖

父雄父弘世仕州郡雄舉孝廉終東郡范令昭烈少孤  
與母販履織席為業舍東南角籬上桑生高五丈餘童  
童如小車蓋涿人李定曰是家當出貴人昭烈方幼與  
宗中諸兒戲桑下言吾必當乘此羽葆蓋車叔父子敬  
曰汝勿妄語滅吾門也年十五母使行學與同宗劉德

然遼西公孫瓚俱事故九江太守同郡盧植德然父元起常資給昭烈與德然等元起妻曰各家何能常爾邪元起曰吾宗中有此兒非常人也而瓚深與昭烈相友瓚年長昭烈以兄事之昭烈不甚樂讀書喜狗馬音樂美衣服身長七尺五寸垂手下膝顧自見其耳有大志少語言善下人喜怒不形于色推仁尚義廓如也好交結豪俠年少爭附之河東關羽亡命來歸與同郡張飛兄事昭烈誓以死從中山大商張世平蘇雙等貲累千

金販馬于涿郡知昭烈非常人乃多與之金昭烈資之

因合徒衆靈帝末黃巾賊起州郡各舉義兵昭烈率其

屬從校尉鄒靖討賊有功除安喜尉

原注典畧平原劉子平知備有武勇

時張純反叛青州被詔遣從事將兵討純過平原子平

薦備于從事遂與相隨遇賊于野備中創陽死賊去後

以軍功為中山安喜尉督郵以公事到縣昭烈求謁不

通直入縛督郵杖二百解綬繫其頸著馬柳

原注五棄官

亡命原注典畧其後州郡被詔書其有軍功為長吏者

之聞督郵在傳舍備欲求見督郵稱疾不肯見備備恨

之因還治將吏卒徑詣傳舍突入門言我被府君密放

後漢書

四



牧督郵遂就牀縛之將出到界自解其綬以繫督郵頸縛之著樹杖百餘下欲殺之督郵求哀乃釋去之

項之大將軍何進遣都尉毋丘毅詣丹陽募兵昭烈與

俱行至下邳遇賊力戰有功除下密丞靈帝崩皇子辯

即位太后何氏臨朝何進誅宦官不克死之原注凡死國死官得

其死者袁紹盡滅宦官董卓入京師廢帝為弘農王立

獻帝弒太后何氏原注義例曰章武元年蜀中傳言獻帝已遇弒昭烈乃發喪制服諡曰孝

愍皇帝遂即皇帝位然獻帝實未崩特曹丕廢為山陽公爾至末帝建興十三年始崩曹獻諡曰孝獻皇帝故

不得從未崩之諡祇曰獻帝

初平元年春正月州郡皆起兵討卓卓弑弘農王劫帝

西遷長安天下大亂昭烈復去官後為高唐尉遷為令

原注英雄記靈帝末年備嘗在京師後與曹公俱還沛國募召合眾會靈帝崩天下大亂備亦起軍從討董卓

為賊所破奔奮威將軍公孫瓚

二年夏六月素紹逐冀州牧韓馥自領州

原注凡曰自領與據皆非

朝命也

攻瓚所置青州刺史田楷冬十月瓚表昭烈為別

部司馬

原注凡曰表表請朝命也曰以者自以為之也

使為楷拒紹數有戰功

試守平原令領平原相郡民劉平素輕昭烈恥為之下

使客刺之客不忍刺語之而去其得人心如此

原注王沉魏書

劉平結客刺備備不知而待客甚厚客以狀語之而去是時人民飢饉屯聚鈔暴備外禦寇難內豐財施士之下者必與同席而寢同蓋而食無所簡擇衆多歸焉素紹還兵攻璜昭烈與楷東

屯齊璜敗紹復攻楷連戰逾年

三年夏四月董卓伏誅

原注凡有罪當誅者曰伏誅

卓黨賈詡以卓

部曲李傕郭汜等反陷長安殺司徒王允

原注凡殺不以罪及兩下

相殺皆曰殺

遂共管朝政於是劉焉據益州劉表據荊州袁

紹據冀州袁術據揚州曹操據兗州其餘州郡皆擁兵

自保更相并滅不復奉朝廷矣

四年冬十月公孫瓚殺幽州牧劉虞自領州

興平元年春二月曹操攻徐州徐州牧陶謙遣使告急于田楷楷與昭烈俱救之時昭烈自有兵千餘人及幽州烏桓雜胡騎又畧得飢民數千人既到謙以丹陽兵四千益之昭烈遂去楷歸謙謙表昭烈為豫州刺史屯小沛夏四月曹操擊破昭烈于郟東秋九月益州牧劉焉卒子璋自領州冬十二月陶謙病篤謂別駕糜竺曰

非劉備不能安北州也謙卒竺率州人迎昭烈昭烈未  
敢當下邳陳登謂昭烈曰今漢室陵遲海內傾覆立功  
立事在于今日鄙州殷富戶口百萬欲屈使君撫臨州  
事不宜抑讓昭烈曰袁公路近在壽春此家四世五公

原注見  
袁紹傳

海內所歸君可以州與之登曰公路驕豪非治

亂之主今欲為使君合步騎十萬上可以匡主濟民成  
五霸之業下可以割地守境以觀時變若使君不見聽  
登亦未敢聽使君也北海相孔融謂昭烈曰袁公路豈

憂國忘家者耶冢中枯骨何足介意今日之事百姓與能天與不取悔不可追昭烈遂領徐州陳登遣使告袁紹曰天禍鄒州州將殂隕民人無主恐貽盟主憂輒奉故平原相劉備領州紹報曰劉玄德弘雅有信義今徐州樂戴誠所望也

二年夏四月曹操攻呂布布來奔李傕郭汜相攻擊張濟挾帝東歸

建安元年夏六月袁術來攻昭烈使張飛守下邳自將

拒術于盱眙淮陰與術戰於石亭相持經月更有勝負  
陶謙故將曹豹為下邳相與張飛相失飛殺之豹衆閉  
營自守城中乖亂素術與呂布書勸令襲下邳許助以  
軍糧布大喜引軍水陸東下中郎將丹陽許耽開門迎  
之張飛敗走布虜昭烈妻子及將吏家口昭烈聞之引  
還比至下邳

謹案比至陳志作北至  
通鑑作比至與此合

兵潰昭烈收餘兵

東取廣陵與素術戰又敗轉軍海西飢餓困蹶

謹案困蹶今志

作困敗此作困  
與宋本合

吏士相啖從事縻竺以家財助軍迫逐

原注音仄無歸乃降于布布亦忿袁術運糧不繼復以昭烈為

豫州刺史還其妻子部曲家屬諸將謂布曰劉備數反

覆難養宜早圖之布不聽以狀語昭烈與并勢擊術使

屯小沛昭烈乃遣關羽守下邳身還小沛秋七月帝至

雒陽

原注雒本作洛魚豢云漢火行忌水故去水加佳自光武後改為雒字

八月曹操却

帝遷許遂專朝政表昭烈為鎮東將軍封宜城亭侯昭

烈復合兵得萬餘人吕布惡之自出兵攻昭烈昭烈敗

走歸許曹操厚遇之表為豫州牧郭嘉等謂操曰備有



英雄之志今不早圖後必為患操不從益兵給糧使東

至沛收散敗以圖呂布是歲孫策據江東

原注義例曰凡事之無日

者附于月之下稱是月無月者附于年之下稱是歲無年者附于其事之首尾如左氏稱初始及季年後之類無事可附者則約其時之早晚於一年之下與其事相涉者即附之此記事之通例也

二年春正月袁術稱帝于壽春韓暹楊奉在下邳寇掠

徐揚間軍饑餓辭呂布欲詣荊州布不聽奉乃私與昭

烈相聞欲共擊布昭烈陽許之冬十一月奉引軍詣沛

昭烈請奉入城飲食未半於座上縛奉斬之暹失奉奔

并州

三年夏五月呂布復與素術通使人齎金詣河內買馬  
為昭烈兵所鈔布怒遣其中郎將高順北地太守張遼  
攻昭烈曹操遣將軍夏侯惇救之為順所敗遂破沛復  
虜昭烈妻子送布昭烈挺身逸遇操于梁與操共擊布  
于下邳冬十二月禽布斬之昭烈復得妻子從操還許  
表昭烈為左將軍禮之愈重出則同輿坐則同席

四年春素紹復攻公孫瓚三月克易京瓚自殺紹遂有

幽州帝自為曹操劫遷專制朝命不得有所為甚于僞

汜帝舅車騎將軍董承

原注裴松之曰董承漢靈帝母董太后之姪于獻帝為丈人蓋

古無丈人之名故謂之舅也

受帝衣帶中密詔令與昭烈誅操未發

操從容謂昭烈曰今天下英雄惟使君與操爾本初之

徒不足數也昭烈方食失匕箸值大雷震昭烈因曰聖

人云迅雷風烈必變良有以也遂與承及長水校尉种

輯將軍吳子蘭王子服等同謀夏四月素術欲經徐州

北就袁紹操遣昭烈督朱靈路招邀擊術程昱郭嘉董

昭皆諫操曰劉備不可遣也操悔追之不及街南走病死朱靈等還冬十一月昭烈遂殺徐州刺史車胄留關

羽守下邳行太守事引軍還小沛

原注胡冲吳歷曹公數遣親近家覘諸將

有賓客酒食者輒因事害之備時

閉門將人種蕪菁曹

公使人問門既去備謂張飛關羽曰

吾豈種菜者乎曹

公必有疑意不可復留其夜開後柵

與飛等輕騎俱去

所得賜遺衣服悉封留之乃往小沛

收合兵衆裴松之

曰魏武帝遣先王統諸將要擊素

銜郭嘉等並諫魏武

不從其事顯然非因種菜邂逅而去

如胡冲所云何乘

僻之東海昌霸反郡縣多叛操為

昭烈衆數萬人遣孫

甚乎

乾與袁紹連和操遣長史劉岱中郎將王忠擊之不克

昭烈謂岱等曰汝百輩來無如我何曹操自來未可知  
爾

五年春正月董承等事覺操殺承及王服种輯皆夷三  
族自將攻昭烈初昭烈謂操方與紹連兵不得東候騎  
卒至言曹公自來昭烈大驚及戰師望風崩潰操盡收  
其衆虜昭烈妻子并禽關羽以歸昭烈走青州青州刺  
史袁譚昭烈故茂才也將步騎迎昭烈昭烈隨譚到平  
原譚馳使白紹紹遣將道路奉迎身去鄴二百里與昭

烈相見駐月餘所失亡士卒稍稍來集操與袁紹相拒  
於官渡汝南黃巾劉辟等叛操應紹紹遣昭烈將兵與  
辟等畧許下夏四月孫策卒弟權代領其衆關羽亡歸  
操遣曹仁將兵擊昭烈昭烈還紹軍陰欲離紹乃說紹  
南連劉表秋七月紹遣昭烈將本兵復至汝南與龔都  
等合衆數千人操遣蔡楊謹案今志作蔡陽宋本作楊與此合擊之為昭  
烈所殺冬十月操大破紹軍

六年秋九月操自擊昭烈紹烈遣糜竺孫乾與劉表相

聞表自郊迎以上賓禮待之益其兵使屯新野荊州豪傑歸昭烈者日益多表疑其心陰禦之一日表置宴蒯越蔡瑁欲因會取昭烈或以急告昭烈託被酒潛遁所乘馬曰的盧走墮檀溪水中昭烈曰的盧今日厄矣可

努力的盧一躍三丈遂得免

謹案傅玄乘與馬賦曰劉備之初降也太祖賜之驄馬

使自至廐選之名馬以百數莫可意者次至下廐有的盧馬委棄莫視瘦瘠骨立劉備檢而取之衆莫不笑之其後劉備奔于荊州逸足電發追不可逮衆乃服焉昭烈益開誠待之越等服其

雅量表亦不復疑終表之世遂無釁故

原注孫盛曰檀溪之事此不然

之言備時蜀旅客主勢殊若有此變豈能晏然終表之  
世而無累故乎此世俗妄說非是實也按陳志豪傑  
歸先主者日益多表疑其心陰禦之則越瑁之  
譖或有之檀溪之急似不為妄今取之是已

七年夏五月袁紹卒子尚自領州劉表遣昭烈拒夏侯  
惇于禁等于博望昭烈設伏兵一旦燒屯偽遜惇等追  
之伏發大破之

九年秋七月曹操克鄴遂有冀青幽并四州

十二年春曹操北征烏桓昭烈說表襲許表不能用操  
自柳城還表謂昭烈曰不用君言失此大會昭烈曰今



天下分裂日尋干戈事會之來豈有終極乎若能應之  
于後者則此未足為恨也昭烈在荊州數年嘗于表坐  
起至厠慨然流涕表怪問昭烈曰平常身不離鞍髀原注音陞

肉皆消今不復騎髀裏肉生日月如流老將至矣而功

業不建是以悲耳

謹案此段裴松之注在昭烈初歸劉表下此据在荊州數年語移在十二

年後昭烈訪士于襄陽司馬徽徽盛稱瑯邪諸葛亮昭烈

三往乃得見問天下大計亮說昭烈取荊益結好孫權

與共圖操興復漢室

十三年秋八月曹操南擊劉表表病篤以州讓昭烈昭

烈不從乃託子琮焉

原注英雄記表病篤上備領荊州刺史魏書表病篤托國于備顧謂曰

我兒不才諸將並零落我死之後卿便攝荊州備曰諸子自賢君其憂病或勸備宜從表言備曰此人待我厚

今從其言人必以表為薄所不忍也表尋卒

謹案三國志曹公南征表會表卒繫在十二年而武帝紀

則云建安十三年秋七月公南征劉表八月表卒兩傳年不符此改屬十三年與曹操傳相應較陳志為密矣

琮自領州九月操至新野琮遣使請降于操時昭烈屯

樊琮不敢告昭烈久之乃覺遣所親問琮琮令宋忠詣

昭烈言故時操已在宛昭烈大驚謂忠曰卿等作事不

早相語禍至乃始告邪引刀向忠曰今斷卿頭不足解  
忿亦恥大丈夫臨別復殺卿輩遣忠去呼部曲共議或  
勸昭烈攻琮荊州可得昭烈曰劉荊州臨危託我以孤  
遺背信自濟吾所不為死何面目以見劉荊州乎遂將  
其衆去過襄陽駐馬呼琮琮懼不能起琮左右及荊州  
人多歸昭烈昭烈過辭劉表墓泣涕而去比到當陽衆  
十餘萬輜重數千兩日行十餘里別遣關羽乘船數百  
艘使會江陵或謂昭烈曰宜速行保江陵今雖擁大衆

被甲者少若曹操兵至何以拒之昭烈曰夫濟大事必

以人為本今人歸吾吾何忍棄去

原注習鑿齒曰先主

明勢逼事危而言不失道追景升之顧則情感三軍應赴義之士則甘與同敗觀其所以結物情者豈徒投醪撫寒含蓼問疾而已哉操以江陵有軍實恐昭烈據之其終濟大業不亦宜乎

乃釋輜重輕軍到襄陽聞昭烈已過操將騎五千急追之一日一夜行三百餘里及于當陽之長阪昭烈棄妻子與諸葛亮張飛趙雲等數十騎走操大獲其人眾輜重昭烈斜趨漢津適與羽船會得濟沔遇表長子江夏

太守琦衆萬餘人與俱到夏口適孫權遣魯肅弔劉表  
二子并說昭烈撫有表衆協力治操肅未至而操已濟  
漢故肅與昭烈遇于當陽長阪肅達權旨致慇懃意且

問昭烈曰豫州今欲何至昭烈曰與蒼梧太守吳巨

謹案

士變及步騭傳皆作吳巨  
與此合陳志作吳臣誤

有舊欲往投之肅曰孫討虜

聰明仁惠敬賢禮士江表英雄咸歸附之已據有六郡  
兵精糧多足以立事今為君計莫若自結于東共濟世  
業巨乃凡人偏在遠郡行將為人所併豈足託乎昭烈

甚悅遂用肅計住鄂縣之樊口冬十月遣諸葛亮隨肅  
求救於孫權權遣周瑜程普等水軍數萬與昭烈并力  
及操戰於赤壁大破之焚其舟船昭烈與周瑜諸軍水  
陸並進追到南郡時又疾疫操軍多死操乃遁歸昭烈  
表劉琦為荊州刺史又南征四郡武陵太守金旋長沙  
太守韓玄桂陽太守趙範零陵太守劉度皆降

原注三  
輔決錄

注金旋字元機京兆人歷位黃門郎漢陽太守徵拜議郎遷中郎將領武陵太守為備所攻却死于律事見魏紀

武本

廬江雷緒率部曲數萬口來歸以諸葛亮為軍師

中郎將督零陵桂陽長沙三郡調其賦稅以充軍實偏將軍趙雲為桂陽太守

十四年冬昭烈表孫權行車騎將軍領徐州牧會劉琦卒權表昭烈領荊州牧周瑜為南郡太守分南岸地以給昭烈昭烈立營於油口改名公安權稍畏之以妹妻昭烈

十五年劉表故吏士多歸昭烈昭烈以周瑜所給地少不足以容衆冬十二月乃自詣京見權求都督荊州周瑜

呂範勸權留之權不從禮遇甚盛綢繆恩紀及歸昭烈謂左右曰孫車騎長上短下其難為下吾不可以再見之乃晝夜兼行至公安聞瑜謀謂龐統曰天下智謀之士所見畧同孔明諫孤莫行亦慮此也孤方危急不得不往孤以仲謀所防在北當賴孤為援故決意不疑耳此誠險塗殆不免周瑜之手未幾瑜卒魯肅代領其衆勸權以荊州借昭烈與共拒曹操權從之權欲與昭烈共取蜀遣使來言曰米賊張魯據巴漢為操耳目規圖益州劉璋不武不能



自守若操得蜀則荊州危矣今欲先攻取璋進討張魯西連全蜀一統吳楚雖有十操無所憂也或以為宜報聽許權終不能越荊有蜀蜀地可為己有荊州主簿殷觀進曰若為權先驅進未能克蜀退為權所乘即事去矣今但可贊其伐蜀而說新據諸郡未可興動權必不敢越我而取蜀如此進退在我可以收吳蜀之利昭烈從之答權使曰益州富彊土地險阻劉璋雖弱足以自守張魯虛偽未必盡忠於操今暴師蜀漢轉輸萬里欲戰克

攻取雖吳起不能定其規孫武不能善其事也曹操雖有無君之心而有奉主之名議者見其失利于赤壁謂其力屈無復遠圖今操三分天下已有其二將欲飲馬於滄海觀兵於吳會豈肯守此坐須老乎而同盟無故自相攻伐借樞於操使敵承其隙非長策也且備與璋託為宗室冀馮英靈以匡漢朝今璋得罪于左右願加寬貸權不聽遣孫瑜率水軍往夏口昭烈不聽軍過謂瑜曰汝欲取蜀吾當被髮入山不失信于天下也使關

羽屯江陵張飛屯秭歸諸葛亮據南郡昭烈自往孱陵  
權不得已召瑜還遷殷觀為別駕從事交趾太守士燮  
以嶺南七郡降于孫權權以步騭為交州刺史盡有嶺  
南地

十六年益州牧劉璋聞曹操將遣鍾繇等向漢中討張  
魯內懷恐懼別駕從事張松說璋請昭烈討魯拒操陰  
謀推戴以為州主璋然之使法正將四千人迎昭烈正  
因陳益州可取之策昭烈疑之龐統言于昭烈曰荊州

荒殘人物殫盡東有孫權北有曹操難以得志益州國富民強戶口百萬四部兵馬所出必具寶貨無求于外得以為資大業可成也昭烈曰今指與吾為水火者曹操也操以急吾以寬操以暴吾以仁操以譎吾以忠每與操反事乃可成爾今以小利而失信義于天下奈何統曰權變之時固非一道所能定也且兼弱攻昧逆取順守古人所貴若事定之後封以大國何負于信今日不取終為人利爾昭烈以為然於是厚以恩意接納正

原注

韋曜吳書備前見張松後得法正皆厚以恩意接納盡其殷勤之歡因問蜀中閭狹兵器府庫人馬衆寡及諸要害道里遠近松等具言之又畫地圖山川處所由是盡知益州虛實案劉璋傳昭烈紀松未嘗見昭烈吳書為乃留諸葛亮關羽等守荊州以趙雲領留營司馬昭

烈將步卒數萬入益州劉璋敕在所供奉昭烈入境如

歸前後贈遺巨億計昭烈自江州北由墊

原注徒協反

江詣

涪璋自出迎相見甚歡張松令法正白昭烈便可於會

所襲璋昭烈曰此大事也不可倉卒璋推昭烈行大司

馬領司隸校尉昭烈亦推璋行鎮西大將軍益州牧璋增

昭烈兵使擊張魯又令督白水軍昭烈并軍三萬餘人車甲器械資貨甚盛璋還成都昭烈北到葭萌未即討魯厚樹恩德以收衆心

十七年冬曹操伐孫權權呼昭烈自救昭烈遣使告璋曰曹操伐吳吳憂危急孫氏與孤本為唇齒又樂進在青泥與關羽相拒今不往救羽進必大克轉侵州界其憂有甚于魯魯自守之賊不足慮也乃從璋求萬兵及資實欲以東行璋但許兵四千其餘皆給半昭烈因激

怒其衆曰吾為益州征強敵師徒勤瘁今帑藏山積而  
怯於功賞望士大夫為出死力其可得乎張松書與昭  
烈及法正曰今大事垂成如何釋此去乎松兄廣陵太  
守肅懼禍白璋發其謀於是璋收斬松嫌隙始構矣璋  
敕關戍諸將文書勿復關通昭烈昭烈大怒召璋白水  
軍督楊懷責以無禮斬之

謹案零陵先賢傳曰劉璋請  
劉備璋將楊懷數諫備悟使

人請璋子禪及懷酒酣備見懷佩匕首備出其匕首謂懷曰將  
軍匕首好孤亦有可得觀之懷與之備得匕首謂懷曰汝小  
子何敢間我兄弟之好乃使黃忠卓膺勒兵向璋昭烈  
即懷罵言未訖備斬之

徑至關頭質諸將并士卒妻子引兵與忠膺等進據涪  
十八年夏五月曹操自立為魏公加九錫璋遣劉瓚冷

苞張任鄧賢吳懿

謹案蜀志無  
吳懿二字

等拒昭烈皆敗退保綿

竹懿詣軍降

原注益部耆舊雜記張任蜀郡人家  
世寒門少有膽勇志節仕州為從事

璋復

遣李嚴督綿竹諸軍嚴率眾降昭烈軍益強分遣諸將

平下屬縣諸葛亮張飛趙雲等將兵泝流定白帝江州

江陽惟關羽留鎮荊州昭烈進軍圍雒時璋子循守城

被攻且一年



十九年夏張任勒兵於鴈橋逆戰被禽昭烈以任忠勇  
欲降之任厲聲曰老臣不復事二主矣乃殺之雒城破  
進圍成都征西將軍馬超率衆來歸屯于城北城中震  
恐後數十日昭烈令從事簡雍入說璋璋從雍出降蜀  
中殷盛豐樂昭烈置酒大饗士卒取城中金銀分賜將  
士還其穀帛昭烈領益州牧諸葛亮為股肱法正為謀  
主關羽張飛馬超為爪牙許靖糜竺簡雍為賓友及董  
和黃權李嚴等本璋之所授用也吳懿費觀等又璋之

婚親也彭萊

原注餘亮反

又璋之所排擯也劉巴者宿昔之所

忌恨也皆處之顯任盡其器能有志之士無不競勸冬

十一月曹操弑皇后伏氏酖殺二皇子

二十年孫權聞昭烈取益州逐劉璋令中司馬諸葛瑾

從昭烈求荊州諸郡昭烈不許曰吾方圖涼州得涼州

當以荊州相與權大怒乃遣呂蒙襲奪長沙零陵桂陽

三郡夏五月昭烈引兵五萬下公安令關羽入益陽時

曹操定漢中張魯走巴西昭烈聞之與權連和分荊州

江夏長沙桂陽東屬南郡零陵武陵西屬引軍還江州  
冬十一月遣黃權將兵迎張魯魯已降操操使夏侯淵  
張郃屯漢中犯巴西界昭烈令張飛進兵宕渠與郃等  
戰于瓦口郃敗走并擊巴西原注牂破之昭烈還成都  
冬反

二十一年夏四月曹操自為魏王

二十二年春三月孫權降于曹操冬昭烈進兵漢中分

遣張飛馬超吳蘭等屯下辨又遣雷銅等入武都

謹案陳志

作入成都上云進兵漢中何有分遣他將入成都之理  
考華陽國志云遣將吳蘭雷銅入武都與此合志誤

二十三年春飛等皆為操兵所破昭烈次于陽平與操將夏侯淵張郃相拒

二十四年春自陽平南渡沔水緣山稍前營于定軍山

謹案陳志作於定軍山勢作營考法正傳作定軍興勢興勢山名作山勢誤此書作營于定軍山據通鑑也

淵等引兵來爭昭烈命黃忠乘高鼓譟攻之大破淵軍

斬淵

原注陳志作斬郃誤

及操所署益州刺史趙顗等操自長安

出斜谷軍遮要以臨漢中昭烈曰曹操雖來無能為也我必有漢川矣及操至昭烈斂衆拒險終不交鋒相守

積月操軍亡者日多乃引軍出朔軍將軍趙雲擊敗之  
夏操遜還長安昭烈遂有漢中遣劉封孟達李平等攻  
申耽于上庸耽舉郡降秋七月羣下上昭烈為漢中王  
表于帝曰平西將軍都亭侯臣馬超左將軍領長史鎮  
軍將軍臣許靖營司馬臣龐羲議曹從事中郎軍議中

郎將臣射援

原注三輔決錄注援字文雄扶風人也其先本姓謝與北地諸謝同族始祖謝服為

將軍出征天子以謝服非令名改為射子孫氏焉兄堅字文固少有美名碑公府為黃門侍郎獻帝之初三輔

饑亂堅去官與弟援南入蜀依劉璋璋以堅為長史劉

備代璋以堅為廣漢蜀郡太守援亦少有名行太尉皇

甫嵩賢其才而以女妻之丞相諸葛亮以提為祭酒遷從事中郎卒官軍師將軍臣諸葛

亮盪寇將軍漢壽亭侯臣關羽征虜將軍新亭侯臣張

飛征西將軍臣黃忠鎮遠將軍臣賴恭揚武將軍臣法

正興業將軍臣李嚴等一百二十人上言曰昔唐堯至

聖而四凶在朝

原注尚書舜流共工于幽州放驩兜于崇山竊三苗于三危殛鯀于羽山四罪

而天下咸服左氏傳舜相堯流四凶族

周成仁賢而四國作難

原注史記成王少周

攝政當國管叔蔡叔霍叔與殷武庚作亂周公東征高

叔武庚管叔放蔡叔霍叔

以微子啟代殷後國于宋高

后稱制而諸呂竊命

原注漢書呂后以周呂侯子台為呂王台弟產為梁王建成侯釋之

子祿為趙王上將軍各領南北軍呂后崩祿產因謀作亂大尉勃與朱虛侯章等共誅之遂滅呂氏立文帝

孝昭幼冲而上官逆謀

原注漢書孝昭上上官皇后上官安之女也安父桀為左將軍與霍

光皆受遺詔輔少主昭帝立安女為皇后以安為車騎將軍桀安遂與燕王旦謀殺霍光因廢帝立桀事覺皆

誅伏皆馮世寵藉履國權窮凶極亂社稷幾危非大舜周

公朱虛博陸則不能流放禽討安危定傾伏惟陛下誕

姿聖德統理萬邦而遭厄運不造之艱董卓首難蕩覆

京畿曹操階禍竊執天衡皇后太子鳩殺見害剥亂天

下殘毀民物久令陛下蒙塵憂厄幽處虛邑人神無主

過絕王命厭昧皇極欲盜神器左將軍領司隸校尉豫  
荆益三州牧宜城亭侯備受朝爵秩念在輸力以殉國  
難覩其機兆赫然憤發與車騎將軍董承同謀誅操將  
安國家克寧舊都會承機事不密令操游魂得遂長惡  
殘泯海內臣等每懼王室大有閭樂之禍

原注史記二世齋于望夷

宮趙高使其婿咸陽令閭樂將吏卒千餘人入宮前即  
二世數曰足下驕恣誅殺無道天下共叛足下足下其

自為計麾其兵  
進二世自殺

**小有定安之變**

原注漢書平帝崩立宣  
帝立孫嬰為皇太子號

曰孺子安漢公莽居攝踐阼稱攝皇帝及莽即真天子  
位封嬰定安公敕阿乳母不得與語常在四壁中至于



長大不能  
名六畜

夙夜惴惴戰慄累息昔在虞書敷序九族周

監二代封建同姓詩著其義歷載長久漢興之初割裂  
疆土尊王子弟是以卒折諸呂之難而成太宗之基臣  
等以備肺腑枝葉宗子藩翰心存國家念在弭亂自操  
破于漢中海內英雄望風蟻附而爵號不顯九錫未加  
非所以鎮衛社稷光昭萬世也奉辭在外禮命斷絕昔  
河西太守梁統等值漢中興限于山河位同權均不能  
相率咸推竇融以為元帥卒立效績推破隗囂

原注後  
漢書更

始以竇融為張掖屬國都尉酒泉太守梁統等推融行  
河西五郡大將軍事遣使奉書獻馬于元武率步騎數  
萬與大將軍會高平共破隗囂與五郡太守詣雒陽  
上涼州牧安豐侯印綬拜冀州牧遷大司空

今社

稷之難急于隴蜀操外吞天下內殘群寮朝廷有蕭牆  
之危而禦侮未建可為寒心臣等輒依舊典封備漢中  
王拜大司馬董齊六軍糾合同盟埽滅凶逆以漢中巴  
蜀廣漢犍為為國所署置依漢初諸侯王故典夫權宜  
之制苟利社稷專之可也然後功成事立臣等退伏矯  
罪雖死無恨遂于沔陽設壇場陳兵列衆羣下陪位讀

奏訖御王冠於昭烈昭烈上言於帝曰臣以具臣之才荷上將之任董督三軍奉辭于外不能掃除寇難靖匡王室久使陛下聖教陵遲六合之內否而未泰惟憂反側疾如疾首曩者董卓造為亂階自是之後羣凶縱橫殘剥海內賴陛下聖德威靈人神同應或忠義奮討或上天降罰暴逆並殪以漸冰消惟獨曹操久未梟除侵擅國權恣心極亂臣昔與車騎將軍董承圖誅討操機事不密承見陷害臣播越失據忠義不果遂使操窮凶極逆

主后戕弑皇子鳩害雖糾合同盟念在奮力懦弱不武

歷年未效常恐殞沒孤負國恩寤寐永歎夕惕若厲今

臣羣寮以為在昔虞書敷叙九族庶明勵翼五帝損益

此道不廢周監二代並建諸姬實賴晉鄭夾輔之福

原注

左氏傳昔武王克商光有天下封其兄弟之國者十有五人姬姓之國者四十人皆舉親也史記大戎殺幽王

晉文侯鄭武公立故高祖龍興尊王子弟大啟九國

原注

漢書諸侯王表九國燕代卒斬諸呂以安太宗今操惡

齊趙梁楚吳淮南長沙也

直醜正實繁有徒包藏禍心篡竊已顯既宗室微弱帝

族無位斟酌古式依假權宜上臣大司馬漢中王臣伏  
自三省受國厚恩荷任一方陳力未效所獲已過不宜  
復忝高位以重罪謗羣寮見逼迫臣以義臣恨惟寇賊

不集國難未已宗廟傾危社稷將墜誠臣憂責碎首之

負

謹案誠臣憂責  
誠陳志作成

若應權通變以寧靖聖朝雖赴水火

所不得辭敢慮常宜以防後悔輒順衆議拜受印璽以  
崇國威仰惟爵號位高寵厚俯思報效憂深責重驚怖  
累息如臨于谷盡力輸誠獎厲六師率齊羣義應天順

時撲討凶逆以寧社稷以報萬分謹拜章因驛上還所  
假左將軍宜城亭侯印綬于是還治成都拔魏延為都  
督鎮漢中起館舍築亭障浚成都至白水關四百餘區  
時關羽攻曹操將曹仁殺龐德禽于禁于樊孫權與曹  
操牋請討羽自效遂令呂蒙取荊州羽師潰死之

二十五年春曹操卒曹丕自為魏王秋七月將軍孟達  
上庸太守申耽叛降于丕副軍中郎將劉封伏誅冬十  
一月丕廢帝為山陽公遂稱尊號

章武元年春三月蜀中傳言獻帝已遇弑王乃發喪制服謚曰孝愍皇帝是後在所並言符瑞故議郎陽泉侯劉豹青衣侯向舉偏將軍張裔黃權大司馬屬殷純益州別駕從事趙祚治中從事楊洪從事祭酒何宗議曹從事杜瓊勸學從事張奭尹默譙周等

謹案顧炎武日知錄曰譙周傳

建興中丞相亮領益州牧命周為勸學從事而先主未稱尊號即有勸學從事張奭尹默譙周等上前後不同按周卒于晉泰始六年年七十二而昭烈即位之年年僅二十有三未必與勸進之列從本傳為是上

言臣聞河圖洛書五經讖緯孔子所甄驗應自遠謹案

雒書甄曜度曰赤三日德昌九世會備合為帝際雒書  
寶號命曰天度帝道備稱皇以統握契百成不敗雒書  
錄運期曰九侯七傑爭命民炊骸道路籍籍履人頭誰  
使主者玄且來孝經鉤命決錄曰帝三建九會備臣父  
羣未亡時言西南數有黃氣直立數丈見來積年時時  
有景雲祥風從璿璣下來應之此為異瑞又二十二年  
中數有氣如旂從西竟東中天而行圖書曰必有天子  
出其方加是年太白熒惑填星常從歲星相追近漢興五星



從歲星謀歲星主義漢位在西義之上方故漢法常以  
歲星候人主當有聖主起于此州以致中興時許帝尚  
存故羣下不敢漏言項者熒惑復追歲星見在胃昴畢  
昂畢為天綱經曰帝星處之衆邪消亡聖諱豫覩推揆  
期驗符合數至若此非一臣聞聖王先天而天不違後  
天而奉天時故應際而生與神合契願大王應天順民  
速即洪業以寧海內太傅許靖安漢將軍麋竺軍師將  
軍諸葛亮太常賴恭光祿勳黃權少府王謀等上言曹

丕篡漢湮滅漢室竊據神器刳迫忠良酷烈無道人鬼  
忿毒咸思劉氏今上無天子海內惶惶靡所式仰羣下  
前後上書者八百餘人咸稱述符瑞圖讖明徵間黃龍  
見武陽赤水九日乃去孝經援神契曰德至淵泉則黃  
龍見龍者君之象也易乾九五飛龍在天大王當龍升  
登帝位也又前關羽圍樊襄陽男子張嘉王休獻玉璽  
璽潛漢水伏于淵泉暉景燭耀靈光徹天夫漢者高祖  
本所起定天下之國號也大王襲先帝軌迹亦興于漢

中也今天子玉璽神光先見璽出襄陽漢水之末明大

王承其下流授與大王以天子位瑞命符應非人力所

致昔周有烏魚之瑞

原注史記武王渡河白魚入于王舟有大自上復于下至王屋流為

烏其色赤其聲魄云

咸曰休哉二祖受命圖書先著以為徵驗今

上天告祥羣儒英俊並進河雒孔子識記咸悉具至伏

惟大王出自孝景皇帝中山靖王之胄本枝百世乾祇

降祚聖姿碩茂神武在躬仁覆積德愛人好士是以四

方歸心焉考省靈圖啟發讖緯神明之表名諱昭著宜

即帝位以纂二祖紹嗣昭穆天下幸甚臣等謹與博士

許慈議即孟先建立禮儀擇令辰上尊號王乃即皇帝

位于成都武擔之南

原注本紀成都有一大夫化為女子顏色美好蓋山精也蜀王取以為

妻不習水土疾病欲歸國蜀王留之無幾物故蜀王發卒之武都擔土于成都郭中築蓋地數畝高十大號曰武擔也裴松之曰武擔山名在成都西

北蓋以乾位在西北故就之以即作

冊曰惟建安二

十六年四月丙午皇帝備敢用玄牡昭告皇天上帝后

土神祇漢有天下歷數無疆曩者王莽篡盜光武皇帝

震怒致誅社稷復存今曹操阻兵安忍戮殺主后滔天

泯夏罔顧天顯操子丕載其凶逆竊居神器羣臣將士  
以為社稷廢備宜脩之嗣武二祖龔行天罰備雖否  
德懼忝帝位詢于庶民外及蠻夷君長僉曰天命不可  
以不答祖業不可以久替四海不可以無主率土式望

在備一人畏天明命又懼漢邦

謹案漢高祖諱邦昭烈  
即伍冊文不應直書漢

邦疑作漢  
祚為是

將湮于地謹擇元日與百寮登壇受皇帝璽

綬修燔瘞告類于天神惟神饗祚于漢家永綏四海

原注

魏書備聞曹公薨遣掾韓丹奉書弔并致聘贈之禮文帝  
慈其因喪求好敕荊州刺史斬丹絕使命典畧備遣軍

謀拔韓冉齋書弔并貢錦布冉稱疾住上庸致其書適會受終有詔報答以引致之備得報書遂稱制凡皆魏自夸之辭非實事也昭烈與操丕不共戴天方討賊復漢豈弔喪致貢與修好乎夏四月大赦

改元以諸葛亮為丞相許靖為司徒置百官立宗廟祫

祭高皇帝以下

原注裴松之曰先主雖云出自孝景而世數悠遠昭穆難明既紹漢祚不知以

何帝為元祖以立親廟于時英賢作輔儒生在官宗廟制度必有憲章而載記闕略良可恨哉五月立

皇后吳氏子禪為皇太子六月立子永為魯王理為梁

王帝忿孫權之附操襲殺關羽欲親討權趙雲等諫不聽令車騎將軍張飛將兵先出閬中盜殺飛以其首奔

權秋七月帝東征權權遺書請和帝不許權令陸遜督  
朱然等拒帝八月權復遣使降魏魏封權為吳王曹氏  
始稱魏與為列國也陸遜李異劉阿等屯巫秭歸將軍  
吳班馮習自巫攻破異等軍次秭歸武陵五谿蠻夷遣  
使請兵

二年春正月帝引軍還秭歸將軍吳班陳式以水軍屯  
夷陵夾江東西岸二月帝自秭歸率諸將進軍緣山絕  
嶺于夷道獠

原注詳  
交反

亭駐營自恨

原注  
音恒

山通武陵遣侍中馬

良安慰五谿蠻夷咸相率響應鎮北將軍黃權督江北  
諸軍與遜軍相拒于夷陵道夏六月黃氣見自秭歸十  
餘里中廣數十丈後十餘日陸遜大破諸軍于猇亭馮  
習張南死之帝自猇亭收合離散棄船由步道還魚復  
將軍傅彤殿後死之改魚復縣曰永安遜遣將軍李異  
劉阿等踵後躡漢軍屯駐南山秋八月收兵還巫帝大  
恚慙曰吾乃為陸遜所折辱豈非天耶黃權在江北不  
得還率衆降魏司徒許靖薨

原注凡諸王三公丞相  
大將軍大司馬皆書薨



權聞帝住白帝甚懼遣使請和帝許之遣太中大夫宗

瑋報命冬十二月漢嘉太守黃元聞帝不豫舉兵叛

三年春二月丞相亮自成都至永安

原注凡漢丞相大將軍大司馬皆以

官冠名尊之也吳魏則並書姓名降殺也

三月將軍陳習

原注音笏

獲黃元斬之帝

病篤託孤于丞相亮尚書令李嚴為副敕太子曰朕初

疾但下痢爾後轉雜他病殆不自濟人五十不稱夭朕

年已六十有餘何所復恨但以卿兄弟為念爾射君到

說丞相歎卿智量甚大增修過于所望審能如此朕復

何憂勉之勉之勿以惡小而為之勿以善小而不為

謹案

賈誼新書審微篇云善不可謂小而無益不善不可謂小而無傷語意正與此合

惟賢惟德可

以服人汝父德薄不足效也汝與丞相從事事之如父

夏四月癸巳帝崩于永安宮年六十三

原注陳壽評曰先主之宏毅寬

厚知人待士蓋有高祖之風焉及其舉國託孤于諸葛亮而心神無二誠君臣之至公古今之盛軌也凡陳志

評與本議不同而有義理者則載本傳下蔑劣不成章者則皆畧去云

義例曰天子曰崩諸侯曰薨大夫曰卒

史漢因之太上皇皇帝太后皇后皆書崩皇子諸王妃夫人公侯大臣皆書薨百官羣寮皆書卒壽以魏為正統一用此例而漢昭烈書殂吳大帝書薨其餘臣寮皆曰卒通鑑因之漢吳主皆書殂例也今更漢從正統

例而魏吳臣主皆書卒如春秋書諸侯曰卒從大夫之例云

亮上言于末帝曰伏惟

大行皇帝

原注天子崩未  
有謚故稱大行

邁仁樹德覆燾無疆昊天不

弔寢疾彌留今月二十四日奄忽升遐臣妾號咷若喪

考妣乃顧遺詔事惟太宗動容損益百寮發哀滿三日

除服到葬期復如禮其郡國太守相都尉縣令長三日

便除服臣亮親受敕戒震畏神靈不敢有違臣請宣下

奉行五月梓宮自永安還成都謚曰昭烈皇帝秋八月

葬惠陵

議曰

原注義例曰初孔子贊易序詩書皆別為篇載于本文後古之制作之法也至左氏為春秋作傳于行事

得失之際則載斷辭曰書曰政書不書君子曰或當世諸人之論與本文錯置然經自經傳自傳猶存古制也及司馬遷作史記于帝紀表書世家列傳作序及論皆稱太史公曰其終篇則有自序及叙傳以韻語敘斷諸人行事與本史錯置班固作漢書其序則即其文序下其論則曰贊或載其父之言則曰任城掾班彪曰其終亦有叙傳後世謂之史述贊亦與本史錯置范曄後漢書其序遵固法而更贊曰論亦或援引其先世及諸人之言更敘傳曰贊置于論之後而序論贊各自為篇載于正史後復古制也至唐章懷太子賢始錯置如史漢陳壽三國志更論曰評而不作贊今既改作參用後漢三國晉宋以來諸儒論議故更評曰議其援引諸人書名而不書官插入本議而斷以已意亦錯置正史間不復如古制別載便觀覽也

三王家天下其子若孫與其族屬

欽定四庫全書

續後漢書  
卷二

三

傳繼紹復則統紀在焉不幸而草竊間貳攘奪叨據終非

其有故羿浞割夏則少康興

原注左氏傳昔夏之方衰也后羿自鉏遷于窮石因

夏氏以代夏政而用伯明氏之子寒浞浞殺羿烹之以食其子子不忍食殺于窮門浞因羿室生澆及豷使澆滅斟灌氏及斟鄩氏而相為澆所滅后緡歸于有仍生少康有夏之臣靡自有禹收二國之燼以滅浞而立少康少康滅澆于過后抒滅豷于戈按史記仲康崩子帝相立中間歷后羿寒浞二世凡篡夏四十有二年而少康復

犬戎斃周則平王立

原注史記幽王嬖愛褒姒生子伯服廢申后并去太子宜

臼以褒姒為后以伯服為太子申后申侯女也申侯怒與緡西夷犬戎攻幽王殺幽王驪山下于是諸侯乃即申侯共立故太子宜臼

是為平王東遷于洛邑

吳楚僭號諸侯不王孔子作春

秋加王于正以大一統

原注吳本伯爵後借稱王楚本男爵後借稱王春秋皆敗而稱

子公羊傳何言乎王正月大一統也

歷五伯迄顯赧二周王室餘七邑

原注

五伯齊桓公晉文公秦穆公宋襄公楚莊王考王封其弟于河南是為桓公卒子威公立卒子惠公立是為西

周公惠公封其少子于鞏號東周公王赧時東西周分治而王赧都西周秦滅東西周比亡凡七縣河南洛陽

谷城平陰偃師鞏緄氏

天下羣起而稱王稱帝

原注六國皆稱王秦稱西帝齊稱東

帝周之統自若也漢得天統莽篡而在光武操竊而在

昭烈魏吳雖僭猶夫吳楚也昭烈天資仁厚字量弘毅

歸然一世之雄以興復漢室為已任崎嶇百折憤而益

堅顛沛之際信義逾明故能終繫景命信大義于天下  
任賢使能灑落誠盡使諸葛亮以死自效復見三代君  
臣高光為不亡矣國賊未討境土未復而債軍崩殂哀  
哉

贊曰於赫漢道滅于閹醜運踰百六載罹陽九

原注漢書元歲

之閹陰陽災三統閹法易九厄曰初入元百六陽九次  
三百七十四陰九次四百八十陽九次七百二十陰七  
次七百二十陽七次六百陰五次六百陽五次四百八  
十陰三次四百八十陽三凡四千六百一十七歲興一  
元終經歲四千五百  
六十災歲五十七  
裂土分曜塞樞解紐兇婪詐慝攘

據叨有嚴翼昭烈仁誠迪哲弘我炎正桓桓秉鉞纂高

系公討賊立國權競請盟丕豈其敵燕南三士


原注關羽張飛

趙雲隆中一賢

原注諸葛亮

左提右挈百折彌堅崦嵫返照騰

輝揭天皇矣帝統既絕復傳







欽定四庫全書

史部

續後漢書卷八

三至

詳校官編修臣黃壽齡

編修臣裴謙覆勘

謄錄貢生臣劉錫珪

謄錄監生臣章儔

謄錄監生臣俞光豫

謄錄監生臣劉堦



末帝今漢亡而帝亦無  
諡故更後主為末帝云

### 末帝

末帝諱禪字公嗣母曰甘皇后建安十二年生於荊州  
二十四年昭烈為漢中王立為王太子及即皇帝位立  
為皇太子冊曰惟章武元年五月辛巳皇帝若曰太子  
禪朕遭漢運艱難賊臣篡盜社稷無主格人羣正以天  
明命朕繼大統今以禪為皇太子以承宗廟祗肅社稷  
使使持節丞相亮授印綬敬聽師傳行一物而三善皆

得焉

原注禮記行一物而三善皆得者惟世子而已其齒於學之謂也鄭玄曰物猶事也

可不勉與

三年夏四月昭烈崩于永安宮五月帝即皇帝位于成

都年十七

原注魚豢魏畧初備在小沛不意曹公卒至遑遑棄家屬後奔荊州禪時年數歲竄匿隨

人西入漢中為人所賣及建安十六年關中破亂扶風人劉括避難入漢中買得禪問知其良家子遂養為子與娶婦生子初禪與備相失時識其父字玄德比舍人有姓簡者及備得益州而簡為將軍備遣簡到漢中舍都邱禪乃詣簡相驗訊事皆符驗簡喜以語張魯魯乃洗沐送詣益州備乃立以為太子初備以諸葛亮為太子太傅及禪立以亮為丞相委以諸事謂亮曰政由葛氏祭則寡人亮亦以禪未聞于政遂總內外

曰二主妃子傳曰後主生于荊州後主傳云初即帝位年十七則建安十二年生也十三年敗于長阪備棄妻

子走趙雲傳曰雲身抱弱子以免即後主也如此備與禪未嘗相失也又諸葛亮以禪立之明年領益州牧其年與主簿杜微書曰朝廷今年十八與禪傳相應理當非虛而魚豢云備敗于小沛禪時始生及奔荊州能識其父字玄德計當五六歲備則敗于小沛時建安五年也至禪初立首尾二十四年禪應過三十矣以事相驗理不得然此則魏畧之妄說乃至二百餘言異也又按諸書記及諸葛亮集亮亦不為太子太傅也

尊皇后曰皇太后大赦改元建興以丞相亮領益州牧南中四郡皆叛秋八月遣尚書郎鄧芝修好於吳孫權

遂絕魏與漢

原注孫氏始稱吳與其國也

立皇后張氏

二年夏吳使輔義中郎將張溫來聘復遣鄧芝報之

三年春三月丞相亮南征秋七月亮討雍闓

原注音愷

斬之

遂平四郡十二月亮還成都

四年春都護李嚴自永安移屯江州築大城

原注裴松之曰今邑郡故

城是留護軍陳到駐永安夏五月曹丕卒子叡立

原注凡魏吳二

主卒立與凡特稱皆書姓名漢之僭偽不成其為君也其君臣皆書卒而無別畧也

五年春三月丞相亮出屯漢中以討魏詔曰朕聞天地

之道福仁而禍淫善積者昌惡積者亡古今常數也是

以湯武修德而王桀紂極暴而滅曩者漢祚中微網漏

凶慝董卓造難震蕩京畿曹操階禍竊執天衡殘剝海  
內懷無君之心子丕孤豎敢尋亂階盜據神器更姓改  
物世濟其凶當此之時皇極幽昧天下無主則我帝命  
殞越於下昭烈皇帝體明叡之德光演文武應乾坤之  
運出身平難經營四方人鬼同謀百姓與能兆民欣戴  
奉順符讖建位易號丕承天序補弊興衰存復祖業誕  
膺皇綱不墜於地萬國未定

謹案今志作未靜未  
本作未定與此合

早世

遐殂朕以幼冲繼統洪基未習師保之訓而嬰祖宗之



重六合壅否社稷不建永惟所以念在匡救光載前緒

未有攸濟朕甚懼焉是以夙興夜寐不敢自逸每崇

謹案

今志崇作從毛本作崇與此合

菲薄以益國用勸分務穡以阜民財授

方任能以參其聽斷私降意以養將士欲奮劔長驅指

討凶逆朱旂未舉而丕已殞喪斯所謂不然我薪而自

焚也殘類餘醜又支天禍恣睢

原注者萃反

河雒阻兵未弭

諸葛丞相弘毅忠壯忘身憂國先帝託以天下以勗朕

躬今授之以旄鉞之重付之以專命之權統領步騎二

十餘萬董督元戎龔行天罰除患寧亂克復舊都在此  
行也昔項籍總一彊衆跨州兼土所務者大然卒敗垓  
下死於東城宗族如焚為笑千載皆以不義陵上虐下

故也

原注史記太史公曰項羽乘勢拔起龍畝之中三  
年遂將五諸侯兵滅秦分裂天下而威海內封立

王侯功絲羽出號為伯王位雖不終近古以來未嘗有  
也及羽背關懷楚放逐義帝而怨王侯畔已難矣自矜  
功伐奮其私智而不師古謂伯王之業欲以力征經營  
天下五年卒亡其國身死東城尚不覺寤不自責過失  
迺引天亡我非用今賊效尤天人所怨奉時宜速庶憑  
兵之罪豈不謬哉

炎精祖宗威靈相助之福所向必克吳王孫權同恤災

患潛軍合謀掎角其後涼州諸國王各遣月支康居胡侯  
支富康植等二十餘人詣授節度大軍比出便欲率將  
兵馬奮戈先驅天命既集人事又至師貞勢并必無敵  
矣夫王者之兵有征無戰尊而且義莫敢抗也故鳴條  
之役軍不血刃牧野之師商人倒戈今旂麾首路其所  
經至亦不欲窮兵極武有能棄邪從正簞食壺漿以迎  
王師者國有常典封寵大小各有品限及魏之宗族支  
葉中外有能規利害審逆順之數來詣降者皆原除之

昔輔果絕親於智氏而蒙舍宗之福

原注戰國策智伯與韓魏圍趙於晉

陽張孟談陰見韓魏之君曰智伯伐趙趙亡則二君為之決二君乃與孟談陰約夜遣人入晉陽智果見二君說智伯曰二主色動而變必背君矣不如殺之智伯曰不可智果出易姓為輔氏微子去殷項

伯歸漢皆授茅土之慶

原注史記微子數諫紂不聽乃持其祭器奔周周公誅武庚立

微子於宋以績殷後漢王以魯公禮葬項王於穀城封項伯等四人皆為列侯賜姓劉氏此前世之

明驗也若其迷沉不反獎助亂人不式王命戮及妻孥

罔有攸赦廣宣恩威誅其元惡弔其殘民他如詔書律

令丞相其露布天下使稱朕意焉孟達復以新城來歸

六年春魏將司馬懿陷新城孟達死之丞相亮伐魏攻

祁山天水南安安定皆舉郡降參軍馬謖

原注所  
六反

及魏

將張郃戰於街亭敗績馬謖伏誅亮請自貶詔以亮為

右將軍行丞相事冬亮復出散關圍陳倉斬魏將王雙

七年春右將軍亮伐魏拔武都陰平二郡復拜丞相夏

五月孫權稱帝改元黃龍遣使以並尊二帝來告詔遣

衛尉陳震賀之權與震盟約中分天下豫青徐幽屬吳

兗冀并梁屬漢司州之土以函谷關為界冬亮徙府營

金史紀事本末卷三  
於南山下原上築漢樂二城

八年秋魏將曹真等入寇丞相亮次于城固赤阪魏師還丞相司馬魏延敗魏雍州刺史郭淮於陽谿徙魯王永為甘陵王梁王理為安平王以魯梁在吳分界故也九年春二月丞相亮伐魏圍祁山三月亮敗魏將郭淮于上邽夏六月亮擊魏將司馬懿於國城大敗之殺其將張郃秋八月中都護李平有罪廢徙梓潼

郡

十年春丞相亮休兵于黃沙

十一年冬丞相亮使諸軍運米集斜谷治斜谷邸閣南夷劉胄反將軍馬忠討平之

十二年春二月丞相亮約吳大舉伐魏三月孝獻皇帝崩于山陽夏四月亮進軍渭南魏將司馬懿引兵拒守亮軍於五大原分兵屯田秋八月亮薨于軍前軍師魏延作亂丞相長史楊儀擊斬之率諸軍還成都初大赦

原注凡致所未有特為者皆書初非推本之初也

以左將軍吳懿為車騎將

軍假節督漢中以丞相留府長史蔣琬為尚書令總統

國事

原注凡尚書令季漢政本所在故拜免皆書

遣中郎將宗預使吳

十三年春正月中軍師楊儀有罪廢徙漢嘉郡夏四月以蔣琬為大將軍錄尚書事費禕為尚書令

十四年夏四月帝至湔

原注裴松之曰湔縣名屬蜀郡音剪

登觀阪看

汶水之流旬日還成都武都氐王符健降徙氐民四百

餘戶於廣都

十五年秋七月皇后張氏崩



延熙元年春正月立皇后張氏大赦改元立子璿為皇  
太子子瑤為安定王冬十一月大將軍琬出屯漢中詔  
曰寇難未弭曹叡驕凶遠東三郡苦其暴虐遂相糾結  
與之離隔叡大興衆役還相攻伐曩秦之亡勝廣首難  
今有此變斯乃天時君其治嚴總帥諸軍屯住漢中須  
吳舉動東西犄角以乘其釁

二年春正月曹叡卒子芳立夏以大將軍琬為大司馬

三年春越雋

原注音髓

蠻夷叛太守張嶷討平之

四年夏大司馬琬徙屯涪

五年春正月監軍姜維督偏軍自漢中徙屯涪

六年冬十月遣前監軍王平督漢中十一月大赦以尚書令費禕為大將軍錄尚書事

七年春三月魏曹奂夏侯玄等寇漢中鎮北大將軍王平拒興勢圍閬月

謹案閬月毛本作閬二月此書在春三月後當是閬三月

大將軍

禕擊奂於三嶺魏師敗走夏四月安平王理薨秋九月

以大將軍禕領益州刺史侍中董允為尚書令

八年秋八月皇太后吳氏崩冬十一月大司馬琬薨

謹案

蜀志將琬卒在九年冬十一月查琬傳亦云至九年薨此書在八年誤

十二月尚書令董

允卒尚書呂乂為尚書令宦者黃皓為中常侍大將軍禕至漢中行圍守

九年夏六月大將軍禕還成都秋大赦以涼州刺史姜

維為衛將軍與大將軍禕並錄尚書事

原注魏畧琬卒禕乃自攝國事

末帝即位年已十七即臨政使諸葛亮南征北伐故亮將出師言末帝當親賢而遠小人宮中府中俱為一體涉罰臧否不宜異同則諫其處事之際當任公道若猶未能政亮其為是言哉魏畧之語殆不其然

十年春涼州胡王白虎文治無戴等率衆等降衛將軍  
姜維居之于繁縣汶山平康夷反維平之帝數出遊觀  
增廣聲樂太子家令譙周諫不聽

十一年夏五月大將軍禕出屯漢中秋涪陵屬國民夷  
反車騎將軍鄧芝討平之

十二年春正月魏司馬懿殺曹奂夏侯霸來奔夏四月  
大赦秋衛將軍姜維伐魏攻雍州不克將軍句安李韶  
叛降魏

十三年冬衛將軍姜維伐魏攻西平不克

十四年夏大將軍禕還成都冬復北駐漢壽大赦尚書令呂又卒以陳祗守尚書令

十五年夏四月孫權卒子亮立立子琮為西河王

十六年春正月盜殺大將軍禕

謹案陳志為魏降人郭循所殺此据綱目書盜

夏四月衛將軍姜維伐魏圍狄道不克

十七年春正月大赦夏六月衛將軍姜維復出隴西伐

魏秋七月魏司馬師廢其主芳為齊王立丕孫髦

原注稱主者正

其號也冬十月姜維拔狄道河間

謹案後漢書地理志隴西郡有河關而無

河間此仍陳志之訛姜維傳俱同

臨洮三縣居民于縣竹繁縣維與魏

將徐質戰于河間敗績溫冠將軍張嶷死之

十八年夏衛將軍姜維復率諸軍出狄道伐魏秋八月

維及魏雍州刺史王經戰于洮西大破之遂圍狄道

十九年春以姜維為大將軍秋七月大將軍維伐魏及

魏將鄧艾戰于段谷敗績維請自貶詔以維為將軍行

大將軍事立子璿為新平王大赦

二十年冬十二月衛將軍維伐魏出駱谷次於芒水大赦

景耀元年春衛將軍維還成都復拜大將軍史官言景

星見於是大赦改元官人黃皓始專政冬十月吳孫綝

原注丑  
林反

廢其主亮為會稽王立權次子休大將軍維徹

漢中諸圍兵退屯漢壽守樂二城

二年夏六月立子諶為北地王恂為新興王雯為上黨王秋八月尚書令陳祗卒以董厥為尚書令諸葛瞻為

僕射

三年春正月魏司馬昭弑其主髦立燕王曹宇之子宇  
秋九月追謚故將軍關羽張飛馬超龐統黃忠

四年春三月追謚故將軍趙雲冬十月大赦以董厥為  
輔國大將軍諸葛瞻為都護衛將軍興平尚書事以樊  
建為尚書令

五年春正月西河王琮薨大將軍維伐魏及魏將鄧艾  
戰於侯和敗績還住留中魏謀大舉入寇維表遣左右



車騎張翼廖化督諸軍分護陽安關口及陰平之橋頭  
黃皓信巫鬼謂敵終不自致啟帝寢其事

炎興元年春詔立故丞相亮廟於沔陽秋八月魏將鄧  
艾鍾會諸葛緒數道入寇遣左右車騎將軍張翼廖化  
輔國大將軍董厥等拒之大赦改元九月鍾會率諸軍  
之漢中使將軍李輔圍王含于漢城護軍荀愷圍蔣斌  
於樂城會徑趣陽安關口守將傅食死之大將軍維逆  
戰敗走與廖化張翼董厥合兵守劔閣以拒會冬十月

鄧艾自陰平趣涪至江油守將馬邈降艾衛將軍諸葛  
瞻及鄧艾戰於緜竹敗績及其子尚皆死之艾之成都  
帝用譙周策降於艾奉書曰限分江漢遇值深遠階緣  
謹案原本作階緣毛本蜀志  
作階緣文義較順今據改蜀土斗絕一隅干運犯冒

漸苒厯載遂與京畿攸隔萬里每維黃初中文皇帝命  
虎牙將軍鮮于輔宣溫密之詔申三好之恩開示門戶  
大義炳然而否德暗弱竊貪遺緒俛仰累紀未率大教  
天威既震人鬼歸能

案陳志歸能下有  
之數二字疑衍

怖駭王師神武

所次敢不草面順以從命輒敕羣帥投戈釋甲官府帑  
藏一無所毀百姓布野餘糧棲畝以俟后來之惠全元  
元之命伏惟大魏布德施化宰輔伊周含覆藏疾謹遣  
私署侍中張紹光祿大夫譙周駙馬都尉鄧良奉齋印  
綬請命告誠敬輸忠款存亡勅賜惟所裁之輿觀在近  
不復縷陳北地王諶不降死之紹良與父相遇於雒縣  
父即報曰王綱失道羣英並起龍戰虎爭終歸真主此  
蓋天命去就之道也自古聖帝爰逮漢魏受命而王者

莫不在乎中王河出圖洛出書聖人則之以興洪業其不由此未有不顛覆者也隗囂馮隴而亡公孫述據蜀而滅

原注後漢書

建武六年隗囂使王元據隴城遣使稱臣於公孫述遂以囂為朔寧王九年囂死王元立囂子純

為王明年周璠等將純降建武元年公孫述僭號統成家十二年吳漢克成都滅公孫氏

此皆前

世覆車之鑒也聖上明哲宰相忠賢將比隆黃軒侔功

前代銜命來征思聞嘉響果煩來使告以德音此非人

事豈天啟哉昔微子歸周實為上賓君子豹變義存大

易來辭謙冲以禮輿觀皆前哲歸命之典也全國為上

破國次之自非通明達智何以見王者之義乎遣趙良  
先還帝又遣太常張峻益州別駕汝超受節度遣太僕  
蔣顯敕大將軍維等降又遣尚書郎李虎送士民簿領

戶二十八萬男女口九十四萬帶甲將士十萬二千吏

四萬人

謹案通典曰蜀後主炎興元年則魏常道鄉公景  
元四年歲次癸未是歲魏滅蜀至晉武帝太康

元年歲次庚子凡一十八年戶增九十八萬六千三百  
八十一口增八百四十九萬九百八十二則當三國鼎  
峙之時天下通計戶百四十七萬三千四百三十三口  
七百六十七萬二千八百八十一以奉三主斯以勤矣

米四十餘萬斛金銀各二十斤錦綺綵絹各二十萬匹

父至城北帝與觀自縛詣軍門父解縛焚觀延請相見

原注晉諸公贊劉琨乘驢車詣父不具七國之禮承制拜帝為驃騎將軍諸圍守

悉被帝敕降大將軍維率諸將降於鍾會父居帝於故

宮資嚴未發

二年

謹案通鑑綱目炎興元年冬十月帝出降漢亡次年書魏咸熙元年炎興無二年此稱二年與綱目

不合考劉封廖化諸傳仍作咸熙元年並知此書炎興二年者在郝經亦非定論矣春正月父見

收鍾會自涪至成都作亂將軍胡烈等討斬之太子璿

大將軍維并遇害帝舉家東遷至雒陽降封帝為安樂

縣公策命之曰惟景元五年三月丁亥皇帝臨軒使太常嘉命劉禪為安樂縣公於戲其進聽朕命蓋統天載物以咸寧為大光宅天下以時雍為盛故孕育羣生者君子之道也乃順承天者坤元之義也上下交暢然後萬物協和庶類獲乂乃者漢氏失統六合震擾我太祖承運龍興弘濟八極是用順天應民撫有區夏於時乃考因羣傑虎爭九服不靜乘間阻遠保據庸蜀遂使西隅殊封方外壅隔自是以來干戈不戢元元之民不得

保安其性幾將五紀朕永惟祖考遺志思在綏輯四海  
率土同軌故爰整六師耀威梁益公恆崇德度深秉大  
正不憚屈身委質以愛民全國為貴降心回慮應機豹  
變履信思順以享無疆之休朕嘉與君公長享顯祿用  
考咨前訓開國胙土率遵舊典錫茲玄牡苴以白茅永  
為魏藩輔往欽哉公其祇服朕命克廣德心以終乃顯  
烈食邑萬戶賜絹萬匹奴婢百人他物稱是子孫為三  
都尉封侯者五十餘人尚書令樊建侍中張紹光祿大



夫譙周祕書令郤正殿中督張通並封列侯晉泰始七

年帝崩於雒陽謚曰思公子恂嗣

原注陳壽評曰後主任賢相則為循理之

君惑闇豎則為昏暗之后傳曰素絲無常唯所染之信矣哉禮國君繼體踰年改元而章武之三年則羊稱建興考之古義體理為遠又國不置史注記無官是以行事多遺災異靡書諸葛亮雖遠于為政凡此之類猶未周焉然經載十二而年名不易軍旅屢興赦不妄下不亦卓乎自亮沒後茲制漸野優劣著矣裴松之曰赦不妄下誠為可稱至于年名不易猶所未達按建武建安之號皆久而不改未聞前史以為美談經載十二蓋何足云豈別有他意求之未至乎亮沒後延熙之號數盈二十茲制漸野事又不然也謹案史通曰陳壽三國志劉後主傳云蜀無史職故災祥靡聞案黃氣見于神蹄犀鳥墮于江水城都言有景星出益州言無宰相氣若

史官不置此事從何而書又曰案蜀志稱王崇補東觀  
許蓋掌禮儀又卻正為祕書郎廣求並部書籍斯則典  
校無關屬將有所矣而陳壽評云  
蜀不置史官得非厚誣諸葛乎

議曰太甲克聽伊尹成王終信周公故皆為賢君末帝  
奉昭烈之命令諸葛亮南征北伐卒信討賊之義亮沒  
而繼用蔣費終亮遺意維持宗社四十餘年亦太甲成  
王之次也當永安屬續之際有嗣子不才君當自取之  
言其時豈無宵人哉苟有疑焉亮能安乎其未踰年而  
改元國君即位樞前必踰年改元緣始終之義一年不

二君緣臣子之心不忍有變於中年也未帝於章武三年夏五月即位即改元為建興非制也陳氏議之是也亮薨而即大赦至於終惑闇闇墮隕先志不死社稷甘為降虜為可責已國不置史注記無官行事多遺災異靡書方漢賊不兩立王業不偏安以誅讐討逆為先務日不暇給未可求備也

贊曰季末中庸受命彌留克聽弗違濟師誅讐終惑孽

寺遂傾大寶組頸軍門竟同軺道

原注史記沛公至灞上秦王子嬰係頸以

組白馬素車奉天  
子璽降軹道旁

樓桑枯死杜鵑不來

原注成都記杜宇亦曰杜主自

天而降稱望帝好稼穡教人務農時荊州鼂靈死其尸  
泝流而上至沅山下復生見望帝望帝因以為相號曰

開明會巫山璽江人遭洪水開明為鑿通流有大功望  
帝因以其位禪焉後望帝死其魂化為鳥名曰杜鵑亦

曰子規博物志杜鵑生于  
寄之他巢百鳥為飼之

惠陵草深鬱有遺哀劍門猶

險巴竇勿嘆

原注晉書巴竇人李特隨流人將入蜀至劍閣箕踞太息頓盼險阻曰劉禪有如此

之地而西轉於人豈非庸才邪

氣數當窮天極有漢

欽定四庫全書

續後漢書卷四上

元 郝經 撰

列傳第一上

后妃

謹案帝紀及家人傳皆有義例后妃諸王傳當亦有之今無疑闕

昭烈甘皇后 穆皇后 兄懿 懿族弟班

末帝敬哀張皇后 張皇后

昭烈甘皇后沛人也昭烈領豫州住小沛納以為妾昭烈數喪嫡室常攝內事生末帝于荊州昭烈窘於當陽

長阪棄后及末帝賴趙雲保護得免后崩葬于南郡章武二年追謚皇思夫人改葬于蜀未至而昭烈崩丞相亮上言皇思夫人履行修仁淑慎其身大行皇帝昔在上將嬪配作合載育聖躬大命不融大行皇帝篤義垂思念皇思夫人神柩在遠飄飄特遣使者奉迎會大行皇帝崩令皇思夫人神柩已到又梓宮在道園陵將成安厝有期臣輒與太常臣賴恭等議禮記曰立愛自親始教民孝也立敬自長始教民順也不忘其親所由生

也春秋之義母以子貴

原注公羊傳桓幼而貴隱長昔而卑子以母貴母以子貴

高皇帝追尊太上昭靈夫人為昭靈皇后

原注漢書高祖五年追尊

先媼曰昭靈夫人高后七年尊昭靈夫人曰昭靈后

孝和皇帝改葬其母梁貴人

尊號曰恭懷皇后

原注後漢書和帝永元九年追尊皇妣梁貴人為皇太后冬十月乙酉改

葬恭懷梁皇后于西陵

孝愍皇帝亦改葬其母王夫人尊號曰靈

懷皇后

原注後漢書獻帝興平元年追尊諡皇妣為靈懷皇后改葬於文昭陵

今皇思夫

人宜有尊號以慰寒泉之思

原注詩爰有寒泉在浚之下有子七人母氏勞苦

輒與恭等案諡法宜曰昭烈皇后詩曰穀則異室死則

同穴故昭烈皇后宜與大行皇帝合葬臣請太尉告宗廟布露天下具禮儀別奏制曰可

穆皇后陳留人也兄吳懿少孤懿父與劉焉有舊是以舉家隨焉入蜀焉有異志而聞善相者相后當大貴焉時將子瑁自隨遂為瑁納后瑁死后寡居昭烈既定益

州而孫夫人還吳

原注漢晉春秋云先主入益州吳遣迎孫夫人夫人欲將太子歸吳諸葛

亮使趙雲勒兵斷江留太子乃得止

羣下勸昭烈聘后昭烈疑與瑁同族

法正進曰論其親疎何異晉文之於子圉乎於是納后



為夫人

原注左氏傳晉太子圉為質于秦秦歸河東而妻之太子圉逃歸惠公卒圉立是為懷公晉文

公至秦秦伯納女五人懷嬴與焉習鑿齒曰夫婚姻人倫之始王化之本匹夫猶不可以無禮而况人君乎

晉文廢禮行權以濟其業故子犯曰有求于人必先從之將奪其國何有于妻非無故而違禮教者也今先主無權事之偏而引前失以為譬非導其君以堯舜之道者先主從之過矣

建安二十四年立

為漢中王后章武元年夏五月策曰朕承天命奉至尊

臨萬國今以后為皇后遣使持節丞相亮授璽綬承宗

廟母天下皇后其敬之哉建興元年五月末帝即位尊

后為皇太后稱長樂宮延熙八年后崩合葬惠陵建興

八年進封懿高陽鄉侯遷左將軍十二年丞相亮薨以懿督漢中車騎將軍假節領雍州刺史進封濟陽侯弟班末帝世稍遷至驃騎將軍假節封綿竹侯

謹案建興八年以下

大典另為一條据目錄併歸本傳之末後倣此

末帝敬哀張皇后車騎將軍張飛長女也章武元年納為太子妃建興元年立為皇后十五年崩葬南陵

張皇后敬哀皇后之妹也建興十五年入為貴人延熙元年春正月策曰朕統承大業君臨天下奉郊廟社稷今

以貴人為皇后使行丞相事左將軍向朗持節授璽綬

勉修中饋恪肅禋祀皇后其敬之哉炎興二年隨末帝

遷雒陽

原注漢晉春秋云魏以蜀宮人賜諸將之無妻者李昭儀曰我不能二三屈辱乃自殺

議曰后妃之德周室為盛太姜太任太姒至於邑姜

原注

太姜太王妃太任王季妃太姒文王妃邑姜武王妃也

世嗣徽音自家刑國以至

於有天下雖堯之明峻德親九族舜之烝烝又觀厥刑

于二女無以尚已故文王演易重巽于離風自火出明

內齊外名之曰家人其繇曰女貞吉孔子為之傳曰女

正位乎內男正位乎外男女正天地之大義也父父子  
子夫夫婦婦正家而天下定及其刪詩以闕雎詠歌后  
妃推為正風之始蓋夫婦人倫之本風化之原聖王所  
以修身而平天下者在乎是矣周室衰微家道日乖至

秦而母后始與政外戚始當國

原注史記秦昭王立王少宣太后自治事任其

弟魏冉為政威震秦國

及漢呂霍上官許趙丁傅王氏

原注呂氏上官事見

昭烈紀

漢書孝宣霍皇后大將軍光女也母顯使淳

于行陰殺許后

立其女為皇后光薨顯與諸壻昆弟謀

反伏誅孝宣許皇后昌邑許廣漢之女也宣帝在民間時廣漢以女妻之生元帝及即位立為皇后為霍顯葉殺

之其後封廣漢為平恩侯許氏侯者凡三人孝成許皇后大司馬車騎將軍平恩侯嘉女也孝成趙皇后與女弟俱為婕妤既立為皇后而弟絕幸為昭儀帝未有繼嗣凡後宮有子輒殺之平帝立王莽廢后為庶人遂自殺孝元傳昭儀哀帝祖母也哀帝即位尊為皇太后后凡傅氏侯者六人平帝立王莽發其冢更以木棺代去珠玉衣掘平其冢周棘其處定陶丁姬哀帝母也易祖師丁將軍之玄孫哀帝即位尊為帝太后兄明為大司馬駟騎將軍輔政侯者凡二人王莽亦發其冢更以木棺孝元王皇后凡十侯五大司馬至莽卒篡漢云至

### 竇鄧閻梁

原注後漢書章德竇皇后大司徒融之曾孫也殺皇太子慶母宋貴人及和帝母梁貴人和帝

即位尊為皇太后臨朝稱制和熹鄧皇后太傅禹之孫也和帝崩立殤帝太后臨朝立安帝復臨朝在位二十年安思閻皇后殺皇太子保母李氏廢皇太子為濟陰王安帝崩太后臨朝以兄顯為車騎將軍定策立北鄉

侯懿北鄉侯亮顯又徵濟北河間王子而中黃門孫程等立順帝誅顯廢太后程等皆封侯號十九侯順烈梁皇后帝崩立冲帝太后臨朝冲帝崩復立質帝太后猶臨朝后兄大將軍冀弒質帝立桓帝而誅李固宦官多所封寵而專朝易主竊命移國閨闈內訌姻婭外潰牀天下大亂

第之間總為牆茨遂無正家之道無復唐虞三代風化之美矣其內官之制依倣秦舊帝母曰皇太后祖母曰太皇太后適曰皇后妾皆稱夫人又有美人良人八子七子長使少使使倂姪娥俗華充依昭儀等號以備內官各有品秩焉

原注漢書昭儀位視丞相爵比諸侯王使倂視上卿比列侯姪娥視中二千石

比闕內侯俗華視真二千石比大上造美人視二千石  
比少上造八子視千石比中更充依視千石比左更七  
子視八百石比右庶長良人視八百石比左庶長良使  
視六百石比五大夫少使視四百石比公乘五官視三  
百石順常視二百石無涓共和娛靈保林良使夜者皆  
視百石上家人子中家人子視有秩斗食云五官以下  
葬司馬  
孝哀入繼大統傳太后稱尊號於是有恭皇太

后恭皇后皇太太后帝太太后等皆亂制也

原注漢書哀帝即位

高昌侯董宏希指上書言宜立丁姬為帝太后師丹劾  
奏董宏懷邪誤朝不道上初即位謙讓從師丹言止後  
乃白令王太后下詔尊定陶恭王為恭皇哀帝因是曰  
春秋母以子貴尊傳太后為恭皇太后丁姬為恭皇后  
各置左右詹事食邑如長信官中官歲餘遂下詔曰漢  
家之制推親親以顯尊尊定陶恭皇之號不宜復稱定

陶其尊恭皇太后為帝太太后丁后為帝太太后後又更號帝太太后為皇太太后稱永信宮帝太太后稱中安宮而成帝母太皇太后本稱長信宮成帝趙后為皇太后並四太后各置少府太僕

光武中興稱號

惟皇后貴人其後置美人宮人采女等而無爵秩昭烈志期恢復不幸而與操遇用武無所奔走狼狽屢棄妻子晚未得蜀戰爭方始祗立一后內職不備亦可以觀其志烈也甘后備嘗險阻終享大號宜哉二張后皆車騎將軍飛之女不忘佐命之義締親勲閥又可見末帝之賢也羣下勸昭烈納穆后帝以同族為疑法正乃勉以辰嬴終玷大德惜哉



贊曰帝皇受命代資內德娠聖承天自家刑國不有淑  
徽盡正壹範兩君四后道隆先漢



欽定四庫全書

續後漢書卷四下

元 郝經 撰

列傳第一下

昭烈二王

魯王永 梁王理

末帝太子六王

太子璿

弟瑤 諡恂

琮 虔

瓚

魯王永字公壽昭烈子末帝庶弟也章武元年六月使

司徒靖立永為魯王策曰少子永受茲青土朕承天序  
繼統大業遵修稽古建爾國家封于東土奄有龜蒙世  
為藩輔嗚呼恭朕之詔惟彼魯邦一變適道風化存焉  
人之好德世茲懿美王其秉心率禮綏爾士民是饗是  
宜其戒之哉建興八年改封甘陵王初永憎宦人黃皓  
皓既信任用事譖構永於末帝稍疏外永至不得朝見  
者十餘年炎興二年東遷雒陽拜奉車都尉封鄉侯  
梁王理字奉孝亦末帝庶弟也與永異母章武元年六

月使司徒靖立理為梁王策曰小子理朕統承漢序祇  
順天命遵脩典秩建爾于東為漢藩輔惟彼梁土畿甸  
之邦民狎教化易導以禮往悉乃心懷保黎庶以永爾  
國王其敬之哉建興八年改封安平王延熙七年薨謚  
曰悼王子哀王胤嗣十九年薨子殤王承嗣二十年薨  
景耀四年詔曰安平王先帝所命三世早夭國世頽絕  
朕用傷悼其以武邑侯輯襲王位輯理子也炎興二年  
東遷雒陽拜奉車都尉封鄉侯

謹案目錄此下有末帝太子璿傳今闕

安定王瑤河西王琮新平王瓚北地王諶新興王恂上

黨王璿皆太子璿之弟也琮以景曜五年薨漢亡諶自

殺見死國傳瑤等五王從末帝遷洛陽晉永嘉之亂祚

胤絕滅惟魯王永之孫玄奔蜀李雄封為安樂公以為

末帝嗣桓溫平李勢玄入于晉不知其所終

原注陳志自太子璿

外見瑤琮瓚恂度六人孫盛蜀世譜亦六人有璿而無度未知孰是孫盛曰永和三年討李勢盛參戎行見

玄于成都

議曰二帝無曹氏之寡恩孫氏之內亂而祚胤單寡生於衰末卒無有成寢微寢滅而璿復死于亂嗚呼天不祚漢乃至此極乎

贊曰六孽分封

原注漢書高帝八男呂后生孝惠帝薄姬生孝文帝齊悼王肥趙隱王如意淮

南厲王長趙幽王友趙共王恢燕靈王建六王皆庶孽也

河山帶礪

原注漢書封爵之誓曰使黃河

如帶泰山若礪國磐石之宗犬牙相制慶自代來本支以永存爰及苗裔

百世

原注文帝生景帝自孝武至光武昭烈皆景帝子孫也

中山薺薺涿水湯湯

孤煙祥開復一高光三起三滅

原注謂高祖至平帝光武至獻帝昭烈至末帝

也  
二帝七王緝熙漢道於戲不忘